



Die **Maties-rugbyklub** het weer 'n suksesvolle seisoen beleef. In die WP se Super A-liga het hulle vir 'n rekord tiende agtereenvolgende keer die Groot Uitdaag-trofee verower. Verder spog die Klub met 54 spelers wat vanjaar vir die WP se onderskeie spanne uitgedraf het, waaronder 10 spelers in die WP Curriebekerspan se begin-vyf-tiental. Die Klub het weer aan die Nasionale Klubrugby-kampioenskappe deelgeneem, maar onverwags in die eerste ronde vasgeval, maar nietemin die Plaatkompetisie gewen.



*BO: Die FNB Matiespan wat die Nasionale Klubkampioenskappe se Plaatkompetisie gewen het.*

Die **Maties-netbalklub** het vanjaar tweede geëindig by die SASSU-toernooi en spog met 23 spelers in Boland se onderskeie spanne. Boland is vanjaar as die nasionale kampioen gekroon. Vyf Maties is ook opgeneem in die SA o.21-span en twee in die SA o.19-span, terwyl Claudia Basson Maties in die Proteaspan verteenwoordig het.

Robert Honiball van die **Maties-gimnastiekklub** het by die Suid-Afrikaanse Gimnastiek-kampioenskap die individuele algehele tweede plek uit 16 deelnemers in die senior Olimpiese-afdeling behaal. In die finaal vir seniors was hy eerste op die ringe, tweede op die brug en derde op die rekstok.

Danksy die nuwe kunstras-waterbasis-hokkiebaan kon die **Maties-hokkieklub** vir die eerste keer in die geskiedenis 'n hokkietoets in Stellenbosch aanbied. Die Spar Suid-Afrikaanse vrouehokkiespan het in Julie dié toetsreeks van vier toetse teen Indië met 3-0 gewen, en altesaam nege van Maties se vroue is opgeneem in die nasionale span wat aan die Wêreldbeker Hokkie-toernooi in Spanje deelgeneem het.

Eric Rose-Innes het op sy beurt die Maties in die nasionale Wêreldbekermanspan verteenwoordig. Verder het Maties se vroue-hokkiespan die WP Grootuitdaagliga vir 'n rekord sewende agtereenvolgende jaar gewen. Die Maties se vroue- en manspan het ook die geskiedenisboeke herskryf deur albei die goue medaljes by die Suid-Afrikaanse Studente-sportunie-(SASSU)-toernooi te verower.

*LINKS: Die Spar SA Vrouehokkiespan het nie net die Indiese Vrouehokkiespan geklop nie, maar het ook 'n paar toekennings vir hulle ongelooflike spel verdien. Hier oorhandig Roelf Venter, Uitvoerende Bemerkingsbestuurder van die Spar Groep, die trofee vir Speler van die Reeks aan die SA en Matie hokkiespeler Taryn Bright.*



*BO: Janus Robberts en Janice Josephs is aangewys as die US se Sportman en Sportvrou van Jaar. Hier is mnr Joep Loots wat die trofee namens Josephs ontvang het, prof Julian Smith, Viserektor (Bedryf) en Robberts.*

Die **Maties-atletiekklub** loop breëbors aangesien die Universiteit se Sportman én Sportvrou van die Jaar uit dié klub se geledere kom. Janus Robberts en Janice Josephs het onderskeidelik met die louere weggestap by vanjaar se US Erekleuredinee. Die jong Robert Oosthuizen het ook die Klub se naam hoog gehou by die 2006 IAAF Wêreld Atletiek-kampioenskappe wat in Augustus in Beijing, China, plaasgevind het. Hy het die goue medalje ingepalm om sodoende Maties se nuwe wêreldkampioen te word.

Die **Maties-judoklub** se Paul Young is vanjaar aangewys as Suid-Afrika se top-judoka nadat hy twee goue medaljes by die Suid-Afrikaanse Kampioenskappe ingepalm het.

In September het **Ilse Hayes** (links) en Fanie van der Merwe, albei sportwetenskapstudente aan die US, aan die Atletiek Wêreldkampioenskappe vir Persone met Gestremdhede deelgeneem. Beide atlete het medaljes huis toe gebring. Ilse Hayes het bronsmedaljes verower in die 200 m en 400 m vir die visueelgestremde klas T13, terwyl Fanie van der Merwe 'n silwermedalje verower het in die 200 m vir persone wat serebraal gestremd is, klas T37.



Drie van die **Maties-fietsryklub** se lede, Dan Craven, Erik Kleinhans en Jaco Wasserfall, het in die tweede helfte van die jaar teruggekeer van hul Europese veldtog, waar hulle waardevolle ondervinding opgedoen het. In hul afwesigheid het Michael Sowerby baie goed gevaar op die pad en Arno Viljoen (foto) uitstekend op sy bergfiets, deur podiumplekke in 'n paar nasionale wedrenne te kry. Stephan Heroldt het ook uitstekend gevaar by die Paralimpiese Spele in Switzerland, waar hy 'n bronsmedalje gewen het. Een van die Klub se gestremde atlete, Chris Wagner, het 'n silwermedalje by die Wêreld Driekamp-kampioenskappe gewen.